

Piniakkat angisuut, soorlu Qilalukkat qaqortat qernertallu pillugit ullumikkutut kisitsisarneq ingerlanneqartassanersoq imaluunniit atortorissaarutit pitsaannerusut atorlugit kisitsisoqartalissaneroq pillugu Apeqquteqaat aallaavigalugu oqallisissiatut siunnersuut.
(Inatsisartunut ilaasortaq Gerth Mikaelen, Naleraq)

Akissuteqaat

(Aalisarnermut, Piniarnermut, Nunalerinermut, Imminut Pilersornermut Avatangiisinullu Naalakkersuisoq)

Siunnersuuteqartup sammisamik pingaarutilimmik oqallisigissallugulu naleqquttumik oqallisissanngortitsineranut qujanaq. Sammisaaq assiliissutitut atortorissaarutit pillugit § 37 naapertorlugu apeqqummi nr. 054-2023-mi aamma qaqinneqarnikuuvoq.

Uumasunik piniakkatsinnik atuineq illersuinerlu pillugit aalajangiinerit paasissutissanik tunngaveqarluni aalajangerneqartarnissaat, Naalakkersuisut pingaartippaat. Tamanna ilaatigut najukkami ilisimasat uumassusilerinikkullu siunnersuinerit atorlugit qulakkeerneqassaaq.

Pinngortitaleriffiup ukiuni arlalinni misissuinerneq assigiinngitsorpassuarni assiliisarneq atortarsimavaa. Assiliineq assersuutigalugu appanik taateraannillu uumasooqatigiinnik kisitsinerneq, appaqarfinni taateraqqarfinnilu ullut qanoq ingerlasarnerannik aamma piaqqiornerup iluatsittassusaanik nakkutilliinerneq, kangerlunni sikusimassutsimik nunamilu apisimassutsimik nakkutilliinerneq kiisalu aarrit qassimaffiannik ataatsimik marlunnilluunniit nakkutilliinerneq atorneqartarpoq.

Tamatuma saniatigut Pinngortitaleriffik timmisartukkut kisitsinerneq atortorissaarutit aamma qassimasarfimmi ataatsimi qasigissanik kisitsinerneq atortorissaarutit aamma qassimaffimmi qasigissanik kisitsinerneq, najukkami tuttunik kisitsinerneq aamma Qimusseriarsuarmi qilalugaqarneranik uppersaasutitut atugassanik assiliineq periutsitut nalinginnaasutut atorniartarsimagaluarpaa.

Misiliinerilli kingulliit pingasut takutippaat atorneqarsinnaanngitsut. Assiliissutit aalajangerlugit ikkussat atorlugit uumasunik kisitsinerup pitsaasumik inerneqarnissaanut pissutsit immikkuullarilluinnartariaqartuummata. Uumasut, nunap immikkoortuanut annikitsuararsuarmut uteqqittartuusariaqarput, soorlu timmissat ivasartut qassimaffimmiluunniit aarrit.

Pinngortitaleriffiup ilisimatitsissutigaa, assiliissutissanik atortorissaarutit aalajangersimasumik inissisimasut atorlugit miluumasut imarmiut kisinnissaat ajornartorsiutaasoq. Naak qilalukkat qernertat najugaanni kangerlummi nunap nuuaniit assiliivik nunamut ikkussaq atorlugu kisitsineq iluatsikkaluarpaa, nalunaarsuutitut tunngaviusunut killilerujussuarmik inerniliisarpoq. Kisitsisit taakkua kisitseriaatsimut taamaattumut, sumiiffik annikitsuinnaaq taamaallaat pisinnaavaa. Taamaammat, arferit kangerlummiittut qanoq amerlatiginersut oqaatigiuminaappoq

Paarlattuanik Pinngortitaleriffiup amerlanertigut immap iluani nipinik immiussissutit, najukkami arfernik nakkutilliinermut atortarpai, nipinik immiussissutit isorartunerujussuarmik immiussisinnaagamik sivilunerusumillu ataavarnerusumik paasissutissanik katersisinnaagamik. Nipinilli paasissutissat sumiiffitsigut aamma killeqarput taamaattumillu piniarnermut siunnersuinermt atatillugu nalinginnaasumik atorneqarneq ajorlutik.

Naalakkersuisut Pinngortitaleriffiup ilisimatusarnermi periutsinik atortunillu toqqagaanut tunngatillugu akuliuttanngilaq. Naalakkersuisut pingartippaat ilisimatusartut, tassunga ilanngullugu Pinngortitaleriffik, pitsaanerpaamik angusaqarnissamut ilisimatusariaatsit sorliit atorneqassanersut pillugit naliliinissamut kiffaanngissuseqassasut.

Taamatut oqaaseqarlunga sammisaq pingaarutalik pillugu oqallittoqarluarnissaanut Naalakkersuisut qilanaarput.